



Basilea, citad a la riva dal Rain.

PETER HEINRICH / PIXELIO.DE



Tschaiver a Basilea: il cortegi va tras la citad veglia.

JARI VILLORIA / PIXELIO.DE

Nua che trais pajais sa scuntran

Ils dus mez chantuns Basilea-Champagna e Basilea-Citad

■ Il chantun Basilea-Champagna intganta las visitadras ed ils visitaders cun sias attracziuns culturalas e sias bellezas natirals: ad Augusta Raurica scuntr'ins ils Romans, a Liestal las scuas en flommas ed en il Giura chatt'ins dents da squagl. Basilea-Citad persvada sco pitschna metropola industrial ritga da cultura. L'onn 1833 è vegnì separà en la «Basler Kantonstrennung» il chantun Basilea en ils dus mez chantuns: Basilea-Citad e Basilea-Champagna. Tenor surfatscha è Basilea-Citad daventà uschia il pli pitschen chantun da la Svizra.



El cumpiglia mo trais vischnancas: Bettingen, Riehen e la citad da Basilea, dumbra però tuttina 191'837 abitants. Basilea-Champagna s'estenda lung ils flums Birs ed Ergolz e cumpiglia bunamain tut las vischnancas dal Laufenthal e da l'Oberbaselbiet. Pliras aglomeraziuns fracziuneschan las zonas ruralas archeologicamain interessantas.

Chastels, baselgias ed in'arena da gladiators

Sche la platta continental Eurasiana e la platta continental africana na fissan betg stuschadas ina cunter l'otra, fiss Basilea-Champagna oz in paradìs per sfunsaders. Enstagl è sa furmà il Giura. Las conchiglias ed ils dents da squagl ch'ins ha chattà en chavas da crap dal chantun Basilea-Champagna èn 160 milliuns onns vegls. E quai ch'è restà è ina vista fantastica fin en las Alps da la Svizra, en las Vogesas da la Frantscha ed en il Gaud Nair da la Germania.

Pli baud sa cumbattevan las famiglias pussantas per questa regiun preziusa. En il temp medieval han ellas costruì, conquistà, vendì, barattà e reconquistà dunsainas

da chastels. L'onn 1830 han dumandà 40 umens da Basilea-Champagna ina nova constituiziun en l'ustaria Bad Bubendorf. In pèr battaglias pli tard han els stgatschà ils ultims chastellans: ils Basileis da Citad.

Geografia ed istorgia han modellà il chantun Basilea-Champagna. Ad Allschwil datti magnificas chasas cun armada da travs en il stil da l'Alsazia. La chapitala Liestal ha ina pitschna bella citad veglia senza autos. Ed en bunamain tut ils vitgs da la part sura da Basilea-Champagna è il center dal vitg anc intact: simplas chasas, tetgaglia faudada, portas-clava en artg radund. En il dom dad Arlesheim construì en il stil da rococo resuna l'ultima orgla Silbermann che po anc vegnir sunada en Svizra.

Bainquant pli dad aut èsi cur ch'ìls gladiators lutgan en l'arena dad Augusta Raurica ad Augst. Dentant dapi 1700 onns n'è il cumbat per vita e mort betg pli sin il program – pervia da la mancanza acuta d'acturs. Restada è percuter la culissa impressiunanta da questa veglia citad romana che fascheva part da la provinza Gallia Belgica e pli tard da provinza Germania superior. Ins suppona che la colonia saja vegnida fundada suenter la conquista da las Alps Centralas sut l'imperatur Augustus enturn l'onn 15 a.C. Il chat il pli vegl ch'ins ha pudì datar cun ils meds da la dendrocronologia è d'attribuir a l'onn 6 a.C.

Tradiziun e cultura

In punct cultural culminant è il tschaiver da Basilea che ha lieu mintg'onn en favrer/mars. Cur che l'ura dat las quatter il glindesdi a bun'ura, cumenzan mintgamai ils trais dis ils pli bels da l'onn cun il «Morgestraich», in cortegi cun lanternas che va tras la citad veglia accumpagnà mo dals suns da piccolo e da schumber. Alura stat la citad sin il chau, ed ultra dals millis da persunas activas vegnan tratgs natiers millis da visitadras e visitaders da tut il mund.

A Basilea-Champagna chatt'ins ina tradiziun ch'è enconuschenta er en il Grischun: A Birseck ed a Leimental schlavazzan las tiraduras ed ils tiradurs da schibettas pitschnas rudellas da lain ardents adina la sonda suenter mesemna da la tschendra. In tir reussì en il tschiel nocturn vegn cumprovà d'ina rudella che tira in fastizi ardent d'intgins tschient meters. Il feu è ina part integrala da Basilea-Champagna: feu da tschaiver qua, cortegi da faclas là. Il «Chluri» che la gliעד da Sissach arda la saira da la gievgia grassa fa mintgant er endament ina cussegliera u in cusseglier communal dal lieu. Il spectacul da tschaiver il pli enconuschent ed il pli privlus en il chantun da Basilea-Champagna è dentant il «Chienbäse»: La dumengia saira traversan scuas e chars en flomma la citad veglia da Liestal. Quest cortegi cun scuas e fuschellas da rascha tras la citad veglia datti dapi il 1902. Sco bab da la tradiziun en sia furma actuala vala il pasterner Eugen Stutz, naschi l'onn 1904. Per stgudar lur furnels duvravan ils pasterners mo il lain dals tieus, l'uschenumnà «chien» che cuntegna blera rascha. Perquai crajan ins che l'idea d'ir cun scuas da tieu tras citad saja in'invenziun dals pasterners. Oriundamain duvea il cortegi da feu dentant surrentar l'enviern.

Ma betg mo ils usits tradiziunals, er var 40 museums, occurrenzas musicalas da tut las direcziuns, capodovras architettonicas sco er artistas ed artists da renum mundial èn quai che caracterisescha Basilea sco lieu da cultura. L'art e la cultura vegnan tgirads dapi tschientaners; il Museum d'art da Basilea ha avert già l'onn 1661 sias portas a la populaziun sco emprim museum da tal gener sin l'entir mund. Oz datti plirs museums da renum mundial a Basilea, uschia p.ex. la Fundaziun Beyeler, il Museum Tinguely, il Museum da l'antica, il Museum istoric u il Museum da las culturas.

Furmaziun ed industria

Sco citad da l'umanissem e cun sia università ch'è vegnida fundada l'onn 1460 e ch'è la pli veglia da la Svizra, ha Basilea ina lunga tradiziun sco center da furmaziun sin tut ils stgalims da scola, da scola auta professunala e d'università.

La citad da Basilea è er ina porta tra-

diziunala a l'Europa, e quai en regard a l'economia, al traffic ed er a la scienza. Basilea, che sa chatta amez la regiun da cunfin dals trais pajais Svizra – Frantscha – Germania, è la regiun economica la pli dinamica da la Svizra ed ina da las regiuns la pli productivas sin l'entir mund. Or da l'industria chimica-farmaceutica classica è resultà in dals «clusters» da farma e da biotecnologia ils pli impurtants

sin l'entir mund – la «biovalley» da Basilea è ina rait che cumpiglia ils concerns mundials cun il pli grond success sco er «spin-offs» e «start-ups» ambizius. Ina gronda impurtanza economica han er l'industria internaziunala da transport e da logistica ed ils servetschs finanziais da tut gener. Ultra da quai è Basilea renunada sco citad da fiera e da congress, e quai dapi l'onn 1471.

Relaziuns cun il chantun Grischun

(tenor Lexicon istoric retic)

Relaziuns pli stretgas cun las autoritads e persunas dal Grischun existan dapi la fundaziun da l'Universitad da Basilea il 1460. Già per l'emprim semester era immatriculà in Ulricus Restlin de Curia, pli tard plevon ad Almen, sco 33avel student a Basilea. Tranter il 1460 ed il 1529 èn attestads 78 ulteriurs students dal Grischun. A partir dal 1471 han lavurers da Basilea explotà salpeter a Cuir per la producziun da pulvra, e per il medem temp è attestà in «conterfeyer» basileis (probabel Bartholomäus Rutenzweig), occupà cun lavurs da pictur vi da la chasa communal da Cuir.

A Basilea è vegnida concludida il settember 1499, suenter la fin da las Guerras svabaisas, la Pasch da Basilea, a la quala èn era sa participads ils mess da las Trais Lias che n'han dentant betg cuntanschi il success ch'els spegtavan sco victurs a la Chalavaina.

Dal temp da l'Umanissem e da la Refurmaziun han las relaziuns tranter Basilea e las Lias cuntanschi lur culminaziun. En ils onns 1520 ha l'investg da Cuir, Paul Ziegler, tgirà stretgs contacts cun umanists da Basilea. Tranter il 16avel ed il 18avel tschientaner han impurtants reformators grischuns sco Johannes Comander, Jakob Salzmänn, Raphael Egli, Gian Travers studegià en la citad, ma era politichers, scienziads e medis dal Grischun sco Christian Sax-Vuorz, Hans von Jochberg, Andrea Ruinelli, Johannes Guler von Wyneck, Gieri Genatsch, Fortunat von Juvalta, Fortunat Sprecher von Bernegg, Johann Anton Grass ed Ulysses von Salis-Marschlins. Dals 169 students grischuns immatriculads en il 16avel tschientaner a Basilea derivavan 103 da l'Engiadina. Enturn il 1582 era il chirurg Johann Nicolaus Stupanus professor a l'Universitad da Basilea. Suenter il Murdraretsch en Vuclina (1620) han era numerus reformats vuclinais (Fatios, Pellizzaris, Grillos,

Paravicinis e.a.) chattà asil en la citad al nord da la Svizra.

In intermez interessant hai dà il 1554: il renumà Sebastian Münster aveva titulà ils Engiadinais en sia «Kosmographie» da «gens furax» (v.d. da laders), menders ch'ìls zagrenders, provocond qua tras grondas irritaziuns. Per purtar plant e dumandar satisfacziun aveva l'Engiadina trames Gian Travers e Balthasar Planta a Basilea. Ma Münster era già mort il 1552, ed il stampadur na pudeva betg vegnir fatg responsabel. Ils Engiadinais èn a la fin finala sa contentads cun ina decleraziun d'onur ed ina «reparaziun» da vart dal stampadur a l'adressa da las Trais Lias, sigillada dal cussegl da Basilea.

Durant l'uschenumnada chatscha da demagogs e la persecuziun d'adevents da la democrazia en Germania suenter il 1820 è daventada la citad da Basilea, sper quellas dad Aarau e Cuir, in refug per ils fugitivs ed è vegnida discreditada da gasettas tudestgas sco fuaina revoluziunara. Circuls da finanzas da Basilea han sustegni essenzialmain la construcziun da la rait da viafier a binari stretg en il Grischun. Il 1888 è vegnida fundada la Viafier a binari stretg Landquart-Tavau SA, ed il 1910 ha ina gruppa d'investiturs da Basilea era pussibilità la realisaziun da la Viafier dal Bernina.

En temps pli recents èn plirs Grischuns stads activs sco professers e recturs a l'Universitad da Basilea (tranter auter Ludwig Rudolf von Sallis). Members da las famiglia Engi, Planta ed auters stevan e stattan anc adina a la testa dad interpresas da l'industria chimica a Basilea ch'occupan era numerus Grischuns.

Il 1959/60 eran immatriculads 35 Grischuns (9 dunnas) a Basilea, il 1990/91 eran quai 59 (21) ed il 2004/05 194 (117). Il 1990 eran domiciliads 1020 Rumantschs en la citad, il 2000 706. Il 1888 è vegnì fundà a Basilea in «Bündner Hülfverein», dal qual è sorti l'odiern «Bündner Verein Basel».



Il teater roman ad Augusta Raurica.

AUGUSTA RAURICA, WWW.AUGUSTA-RAURICA.CH

La presentaziun:
Dossiers «Chantun Basilea»

Dapli infurmaziuns:

chatta.ch/?hiid=1833
chatta.ch/?hiid=1851
www.chattà.ch